

forma non possit dare tale esse corporeum ; quoniam anima rationalis est spiritualis, carens quantitate, sine qua corporeitatis ratio non datur ; sicut enim se habet forma albi respectu denominationis nigri , ita forma substantialis respectu denominationis corporei se habet ; atqui forma albedinis non potest dare esse nigrum ; ergo neque forma substantialis esse corporeum. nec a materia sola dicitur corpus , quia est tantum pars , & per Aristotelem , nec quid, neque quale, neq; quantum ; pars namque, & maxime non quanta, non potest denominare totum corporeum , nemo namque dat quod non habet .

18 Confirmatur a me ratio adducta. si anima rationalis componeret formaliter corpus , sequeretur , quod anima Christi veniret ex vi verborum in Eucharistiae Sacramento, quod tamen est falsum , vt Concilia fatentur.

19 Nec dicat quis, quod anima Christi per verba consecrationis venit in Eucharistiae Sacramento , prout dat esse corporeum corpori directe , indirecte vero sub alijs formalitatibus.

20 Nec dicat hoc, inquam , quoniam vel venit anima, quantum formaliter est constitutiva corporis materialiter, videlicet secundum illam formalitatem , secundum quam cum materia constituit corpus , & hoc non est dicendum esse in anima, deberet esse necessario formaliter corporea; at ipsa est totaliter spiritualis. neque dicendum est , quod venit in Sacramento Eucharistiae, prout est forma ut sic , & ita constituit corpus Christi , aliter si per impossibile daretur forma substantialis spiritualis unita cum alia parte substanciali , aut cum subiecto spirituali , constitueret corpus , quod implicat, cum spirituali rei esse corporeum repugnet . quod autem illud sequeretur, clarum est , vbi cumque est causa formalis , ibi est effectus formalis ; si anima rationalis formaliter constituit corpus , vbi cumque erit , hoc faciet ; tum quia, licet ex forma , siue parte perfectiua ut talis est , & ex subiecto , ut tale fiat unum substanciali , non tamen fit unum corporeum , vel spirituale , nemo dat , quod non habet ; debet igitur corporeum constitui ex duabus partibus corporeis , quod non inuenitur in anima rationali , nec in prima materia Aristotelica , ut dicit ipsemet Aristoteles a me citatus supra n. 17.; & si subdant animam esse virtualiter corpoream , atque adeo corpus posse constituere , ego subdam ; ergo album potest facere nigrum, cum virtualiter sit nigrum ; tum quia perfectibile , & perfectuum comparantur ad inuicem tamquam proprius actus,